

TEZAUUR LITURGIC
14 SEPTEMBRIE

ACATISTUL
SFINTEI CRUCI
VI



MOSCOVA, 2000



Акафист

Честному и Животворящему

Кресту Господню

Кондак 1

Возбранный Воеводо и Господи, смерти и ада победителю, Крестом Твоим и воскресением спасение мира соделал еси посреде земли. Но яко имеяй милосердие неизреченное, спаси нас, Сыне Божий, плотию распныйся за ны, да зовем Ти:

Кресту Твоему покланяемся, Владыко, и Святое Воскресение Твое славим!

Икос 1

Ангелов Творец и Создатель всего видимаго и невидимаго, сотворивый человека и по грехопадении его не отринувый, ибо Сын Божий, представ, рече Богу и Отцу: "Се иду сотворити волю Твою, Боже", - страшныя страсти, Крест и вольную смерть предначертая себе, сего ради поклонение Тебе, Спасе наш, приносим, милосердие Твое, прежде сложения мира явленное нам, величающе сице:

Кресту Твоему покланяемся, Христе, Им же

показал любовь Отца небеснаго.

Кресту Твоему покланяемся, Христе, Им же явился любовь Духа Святаго, силою крестною торжествующая.

Кресту Твоему покланяемся, Христе, Им же известия Пресвятая Троицы правда милосердствующая.

Кресту Твоему покланяемся, Христе, яко Той есть совершение нашего спасения.

Кресту Твоему покланяемся, Христе, яко Той есть от века таинства явление.

Кресту Твоему покланяемся, Владыко, и Святое Воскресение Твое славим!

Кондак 2

Видя прегрешившия человеки зельне плачущия, Господи, умилосердився, надежду спасения подал еси им, глаголя: "Семя жены сотрет главу змия и рай паки отверзет вам", сице и о нас умилосердися, человеколюбче, и грехами умерщвленныя наши души воскреси, зовущия: Аллилуиа.

Икос 2

Разум недоразуменных обетований Твоих уразумети подавая, в образах и сени Креста Твоего силу показал еси, Господи, о сем Тебе самаго Бога разумов славим, поюще сице: Кресту Твоему покланяемся, Христе, Его же

тайнодейственно Авраам жертвоприношением Исаака предъизобрази.

Кресту Твоему покланяемся, Христе, Им же Иаков применением рук, образне дети благослови.

Кресту Твоему покланяемся, Христе, Им же Израиль из Египта изведется.

Кресту Твоему покланяемся, Христе, Его же силою море пресечется.

Кресту Твоему покланяемся, Христе, Им же Моисей из камени воду источи.

Кресту Твоему покланяемся, Христе, Им же жезл Ааронов процветший священство утверди.

Кресту Твоему покланяемся, Владыко, и Святое Воскресение Твое славим!

Кондак 3

Силою свыше пророки Твоя облекл еси, Спасе наш, и от Святаго Духа просвещаемы, глаголаша святии Божии человецы, Крест Твой предвещаючи, яко овча на заклание ведется, Агнче Божий, вземляй грехи мира.

Облецы и нас теплотою Духа Твоего и даждь нам с любовью Кресту Твоему поклоняющимся, пети Тебе: Аллилуиа.

Икос 3

Имеяй богатство милосердия, тако возлюби Бог мир, яко и Сына Своего едиnorodнаго дал есть,

Егоже, яко агнца закланнаго, прежде сложения
мира многообразне яви. Сих ради приносим
Тебе песнь славословия такуюю:

Кресту Твоему покланяемся, Христе, Им же
медный змий, на древо вознесенный, от змиев
укушенные исцели.

Кресту Твоему покланяемся, Христе, Им же
люди, умерщвленные грехм, оживотвори.

Кресту Твоему покланяемся, Христе, Его же
силою враги победы преподобных рук
вознесение.

Кресту Твоему покланяемся, Христе, Им же всем
твориши от бед избавление.

Кресту Твоему покланяемся, Христе, Им же
древо, вложенное во источник, естество вод
измени.

Кресту Твоему покланяемся, Христе, Его же
знамением жезл ангельский Гедеонову жертву
воспламени.

Кресту Твоему покланяемся, Владыко, и Святое
Воскресение Твое славим!

Кондак 4

Бурю внутрь имеяй помышлений сумнительных,
Исаия виде на престоле образно
превознесеннаго Бога и вопияше: "Окаянен есмь
человек, нечистыя устне имый". Ты же к нему:
"Иди и рцы людем моим слово Мое". И шед,
явственно благовести Спаса всех: яко Той язвен

бысть за грехи наша и мучен бысть за беззакония наша.

Мы же, познавше Тебе, распеншагося за нас, Его же язвами исцелехом, благодарственно вопием: Аллилуиа.

Икос 4

Слышавши апостоли Твои, Господи, неизреченныя предвещания Твоя, яко подобает Тебе много пострадати, убиену быти и в третий день воскреснути, не разумеваху таинства Креста Твоего, зане сокровен бысть от них глагол сей, дондеже отверзе им ум разумети писания, просвети убо очи мысленныя нас, вопиющих Тебе и глаголющих:

Кресту Твоему покланяемся, Христе, Им же умы и сердца верных просвещаеши.

Кресту Твоему покланяемся, Христе, Им же сумнящихся в вере утверждаеши.

Кресту Твоему покланяемся, Христе, Им же грешники к покаянию обращаеши.

Кресту Твоему покланяемся, Христе, Им же демонов от человек прогоняеши.

Кресту Твоему покланяемся, Христе, яко Той есть упования христианскаго знамение.

Кресту Твоему покланяемся, Христе, яко Той есть Церкви Твоея венчание.

Кресту Твоему покланяемся, Владыко, и Святое Воскресение Твое славим!

Кондак 5

Боготочною кровию Твоею, на Кресте
излиянною, искупил ны есть от клятвы
законныя, распятие претерпев и копием
прободся, Спасе наш, сего ради вопием Тебе:
Аллилуиа.

Икос 5

Видевше жены еврейския Тебе, грядущаго на
вольную страсть и падающаго под тяжестью
Креста Твоего, Иисусе, плакахуся зело. К ним же
обращая, Ты рекл еси: "Дщери Иерусалимския,
не плачьтеся о Мне, плачьте же паче о себе и
чад ваших, яко дние грядут, в няже рекут:

"Блаженны неплоды и утробы, яже не родиша и
сосцы, яже не доиша, когда начнут глаголати
горам: "Падите на нас и холмам: покройте нас".

Мы же в скорбех и печалех наших припадаем к
Тебе, Спасе, на сем пути и вопием:

Кресту Твоему покланяемся, Христе, Им же
отгоняеши от нас рыдания.

Кресту Твоему покланяемся, Христе, Им же
приносиши нам радование.

Кресту Твоему покланяемся, Христе, Иже есть
скорбящим утешение.

Кресту Твоему покланяемся, Христе, Иже есть
болящих исцеление.

Кресту Твоему покланяемся, Христе, Им же
даруеши грешникам кающимся прощение.

Кресту Твоему покланяемся, Христе, Иже есть умерщвленных грехами воскресение.
Кресту Твоему покланяемся, Владыко, и Святое Воскресение Твое славим!

Кондак 6

Проповедников богоносных вещание и глаголы пророческия исполняя, многовидныя и лютыя страсти, распятие и смерть претерпети изволил еси, Спасе. Мы же ранами Твоими исцелевше, пети навыкохом: Аллилуиа.

Икос 6

Возсия вселенней Крест Твой всечестный, на Немже грехи наша, вознесши на теле Своем, пригвоздил еси, Иисусе. Мы же, спасение получившие, вопием:

Кресту Твоему покланяемся, Христе, знамению любви Твоея неизреченныя.

Кресту Твоему покланяемся, Христе, образу милости Твоея безконечныя.

Кресту Твоему покланяемся, Христе, средостение вражды в человецех разорившему.

Кресту Твоему покланяемся, Христе, Бога с человеки соединившему.

Кресту Твоему покланяемся, Христе, мир на земли явившему.

Кресту Твоему покланяемся, Христе, светом Твоим вся просветившему.

Кресту Твоему покланяемся, Владыко, и Святое Воскресение Твое славим!

Кондак 7

Хотя сокровенную тайну от века открыти, яко овча на заклание веден был еси, Иисусе, и яко агнец прямо стригущаго его безгласен, наказание за грехи всего мира прием на себя, да нас свободиши зовущих: Аллилуиа.

Икос 7

Дивное показал еси на Кресте Твоем Божественное истощание, Сыне Божий. Темже чудящися, вопием:

Кресту Твоему покланяемся, Христе, на Немже претерпел еси язвы гвоздинныя.

Кресту Твоему покланяемся, Христе, на Немже вкусил еси оцта и желчи смешение.

Кресту Твоему покланяемся, Христе, на Немже вися, слышал еси хулы и ругания.

Кресту Твоему покланяемся, Христе, на Немже бе вины Твоея написание.

Кресту Твоему покланяемся, Христе, на Немже вещал еси Матери Твоей утешение.

Кресту Твоему покланяемся, Христе, на Немже учредил еси ученика Твоего Матери Твоей всыновление.

Кресту Твоему покланяемся, Владыко, и Святое Воскресение Твое славим!

Кондак 8

Странна Бога вочеловечшася видяще на Кресте
висяща, мертва, нага, умалена паче всех сынов
человеческих, устранимся суетнаго мира, ум на
небеса преложше. Сего бо ради высокий Бог на
землю сниде и Крест, и смерть претерпе, да нас
на небеса возведет, вопиющих Ему: Аллилуиа.

Икос 8

Весь еси любовь, весь еси желание, весь еси
благость, весь еси снисхождение, весь еси
милосердие и щедрот бездна, Сыне Божий,
волею ради нас пострада и смертью Своею
смерть умертви и Кровию Своею жизнь нам
дарова поющим:

Кресту Твоему покланяемся, Христе, Им же
ниспосылаеши светлость душевную.

Кресту Твоему покланяемся, Христе, Им же
даруеши нам сладость сердечную.

Кресту Твоему покланяемся, Христе, Им же
помогаеши нам стяжати быстроту умную.

Кресту Твоему покланяемся, Христе, Им же
утверждаеши крепость телесную.

Кресту Твоему покланяемся, Христе, Им же
печатлееши в нас надежду известную.

Кресту Твоему покланяемся, Христе, Им же
способствуеши нам сохранять память
предвечную.

Кресту Твоему покланяемся, Владыко, и Святое Воскресение Твое славим!

Кондак 9

Все естество всея твари изменися, зряще Тебе на Кресте висима, Христе, солнце омрачися и земли основания сотрясошася, гроби отверзошася и многа телеса усопших святых возсташа, мы же, поклоняющесе страстем Твоим, Христе, зовем: Аллилуиа.

Икос 9

Витии многовещанная, яко рыбы безгласная, видим о Тебе, Иисусе Спасе наш, недоумеют бо глаголати, како Бог непреложный и человек совершенный на кресте пригвождается, мы же таинству дивящесе, вопием:

Кресту Твоему покланяемся, Христе, на Нем же пригвоздися Жених Церковный.

Кресту Твоему покланяемся, Христе, на Нем же в ребра прободеса Сын Божий, во Иордане и на Фаворе нареченный.

Кресту Твоему покланяемся, Христе, на Нем же руке и нозе предал еси на раны.

Кресту Твоему покланяемся, Христе, на Нем же лице Твое не отвратил еси от заплеваний.

Кресту Твоему покланяемся, Христе, на Нем же вопиял еси Отцу Небесному: "Вскую оставил еси Мене, Боже Мой, Боже Мой".

Кресту Твоему покланяемся, Христе, на Нем же умирая, гласом велиим воззвал еси: "Отче, в руке Твои предаю дух Мой".

Кресту Твоему покланяемся, Владыко, и Святое Воскресение Твое славим!

Кондак 10

Спасти хотя мир, Востоке востоком, к темному западу, естеству нашему пришед, смирился еси до смерти, смерти же крестныя.

Тем же превознесся Твое имя паче всякаго имене, и от всех колен небесных и земных слышим: Аллилуиа.

Икос 10

Царю Небесный, утешителю, Христе, истинный, разбойника благоразумнаго во едином часе рая сподобил еси, просвети и нас Древом Крестным и спаси, да вопием во умилении хвалебныя песни Кресту Твоему поюще:

Кресту Твоему покланяемся, Христе, Им же подаеши и самым отчаянным грешникам прощение.

Кресту Твоему покланяемся, Христе, Им же сподобляеши заблудших вразумления.

Кресту Твоему покланяемся, Христе, яко Той есть напаствующих заступление.

Кресту Твоему покланяемся, Христе, яко Той есть падших возстановление.

Кресту Твоему покланяемся, Христе, яко Того
силою плоть нашу со страстьми и похотьми
распинаем.

Кресту Твоему покланяемся, Христе, яко Того
помощию гордость всяку и грех запинаящий
нас отвергаем.

Кресту Твоему покланяемся, Владыко, и Святое
Воскресение Твое славим!

Кондак 11

Пение всеумилненное приносим Тебе, Спасе наш,
Крест Твой животворящий славим, Им же спасл
еси от работы вражия, и благодарственно
вопием ти: Аллилуиа.

Икос 11

Светодательна светильника сущим во тьме
неразумия зрим пречестный и животворящий
Крест Твой, Господи, Им же невестественный
вжигающи огонь, наставляеши к разуму

Божественному всех, вопиющих таковая:

Кресту Твоему покланяемся, Христе, яко Той
есть вселенная держава.

Кресту Твоему покланяемся, Христе, яко Той
есть Церкви Твоя слава.

Кресту Твоему покланяемся, Христе, яко Той
есть храмов Божиих украшение.

Кресту Твоему покланяемся, Христе, яко Той
есть священнх таинств веры нашея

совершенство.

Кресту Твоему поклоняемся, Христе, яко Той
есть честных даров благодатию Святаго Духа
освящение.

Кресту Твоему поклоняемся, Христе, яко Той
есть мертвых грехми и плотию воскресение.

Кресту Твоему поклоняемся, Владыко, и Святое
Воскресение Твое славим!

Кондак 12

Благодать спасения подаждь нам, жизни
подателю, Христе Боже, честным и
животворящим Крестом Твоим, Им же суетнаго
жития убегаем и благодатей духовных
сподобляемся, да славяще Тебе, поем: Аллилуиа.

Икос 12

Поюще страшныя страсти и животворящий
Крест Твой и вольную страсть, яже ради нас
человеков и ради нашего спасения претерпел
еси, Боже наш, веруем и исповедуем, яко
воистину Сын Божий еси, пришедый в мир
грешныя спасти, и во умилении зовем:

Кресту Твоему поклоняемся, Христе, на Нем
вознесенный всех к Себе привлекаеши.

Кресту Твоему поклоняемся, Христе, Им же
разбойнику благоразумному рай отверзаеши.

Кресту Твоему поклоняемся, Христе, у Его же
подножия сотник, Бога не ведущий, исповеда

Тебе Сыном Божиим.

Кресту Твоему покланяемся, Христе, яко Тем разорил еси верей преисподней.

Кресту Твоему покланяемся, Христе, яко на Нем совершил еси всего рода человеческого искупление.

Кресту Твоему покланяемся, Христе, яко на Нем, смертью Твоею смерть поправ, даровал еси нам воскресение.

Кресту Твоему покланяемся, Владыко, и Святое Воскресение Твое славим!

Кондак 13

О, пресладкий и всещедрый Иисусе Христе, хотяй судити живым и мертвым, прими сие моление наше, егда явится на небеси в той Страшный День знамение Сына человеческого, Крест Твой святой, и, узрев Тебе , грядущаго на облацех небесных с силою и славою многою, восплачутся вся колена земная, тогда нас пощади, Спасе наш, Кресту Твоему покланяющихся и вопиющих: Аллилуиа.

